

SCHLÖSSLI TIMES

Scho wieder voll dra....

In dere Ussgob:

Fasnacht Aesch

2

Fasnacht Basel

3-4

Bummel

4

Ussprochsitzig

5

GV 2019

6

Summerhock

7

Unser Lokal

8

Als wärs Geschter gsi... und doch isch d'Fasnacht scho fascht e halbs Johr här. D' Schlössli Schränzer sind scho voll ins neue Vereinsjahr gstartet, sind scho wieder voll am Probe, s'Sujet für d'Fasnacht 2020 stoht und die erschte Mäss fürs neue Kostüm sind scho gnoh. Natürlich hämmer au wieder die eint oder anderi Veränderig erfahre.... Mitglieder sind gange oder pausiere, 9 Neui, 2 halb Neui und 1 pausierend's Mitglied sind neu, wieder oder jetzt so richtig bi de Schlösslis aktiv drbi. Nach de erschte Probe und em Summerhock cha me säge, au in dr neue Zämmesetzig stimmt d'Chemie wie eh und jeh und mir sind voller Tatedrang im neue Vereinsjahr acho. Zu de neue Mitglieder sind no dr eint oder ander Instrumäntewächsel drzue cho... wie me seht wird's uns ganz bestimmt nid langwüilig wärde... aber das isches jo bi de Schlössli-Schränzer eigentlich überhaupt nie ☺

Wenn au chli verspöhtet, informiere mir Euch in dere Ussgob was mir an dr Fasnacht und in de drufffolgende Monet alles erläbt händ.

Immer ufem laufende uf:

www.schloessli-schraenzer.ch

S'erschtmol wärded Ihr uns die Saison z'Aesch in de Räbe aträffe. Am 6. Oktober übernahme mir d'Räbwach. Für Spies und Trank wird gsorgt sii.

Matti-Babbe-Fischi

Schlössli-Schränzer Termine Herbst 19

6. Oktober

Räbwach Klus Aesch

19. Oktober

Probessamschtig (interner Aalass)

16. November

eXbrass, Xmen Group Langenau (Schopfheim, DE)

Fasnacht Aesch

Obwohl mir an dr GV 2018 entschiende händ, im 2019 drei Täg in Basel Fasnacht z'mache, hämmer uns natürlich nid lo näh, an dr Aescher Fasnacht teilznäh. Bimene chline Aperö bi dr Sek, bi no nid ganz sicher trochenem Wätter hämmer uns alli Zämme troffe uff uns uf die bestehendi Fasnacht izstimme. D'Stimmig isch guet gsi, Ztrinke und au öbbis z'Ässe hets gäh und so isch d'Stimmig gstiege. Me het sich ufem Schuelhuusplatz d'Wääge und d'Sujet vo de andere Umzugsteilnähmer chönne aluege und het Fründe troffe. Denn simmer wie gwöhnlich hinter de Bärefelswaggis igstande. Dr Waage hämmer jo scho am Vortag bi dr Waagetaufi chönne genau beguetachte.

D'Stross isch zwar no nass gsi, aber vo Obe isch mitlerwiile troche gsi. Es het schön viel Lüt gha durs Dorf dure am Strosserand und mir händ mit em Tobi e neue Major z'forderscht vorne in dr Reihe gha. Sogar im Schritt isch er gloffe... das het in dr Marschprob no ganz anderscht ussgseh ;-)

Wie gwohnt isch au scho die erscht Rundi schnäll dure gsi und mir händ uns in dr Gartestrooss wieder agstellt für die zweeti Rundi. Die isch wie immer einiges länger gange wie die erschi, das aber immer no troche und sogar mit bitzt Sunneschiin.

Nachem Umzug simmer denn zrug ins Dorf marschiert, spielend natürlich, und händ denn no s'einte oder andere Ständeli gäh. Dr Maage het langsam knurrt und e Pause händ alli verdient. Mir händ wieder dörfe d'Gaschtfründschaft vom Fүүrwehverein gniesse und sind unde im Fүүrwehmagazing bekocht worde. Nach dere längere Pause simmer wieder zrug ins Dorf go musiziere und dr eint oder ander go schnappe.

Dr Mäntig, also dr Obestraich hämmer ussgloh und händ uns am Zischtig z'Obe für d'Schluuchete Troffe. S'Wätter hets guet gmeint und es het viele Lüt vor de verschieden Bühne gha. Guggene vo noch und färn händ ihres Repertoire präsentiert und s'Aescher Fasnachtsvolk begeischeret. Zwüsche de 3 Ufftritt hämmer gnueg Pause gha zum de andere Gugge zuezlose, sich zunterhalte oder eifach e Bierli oder e Lutz z'schlürfe. Es isch e tolle Obe gsi mit viel Fasnachts-Sound und überall gueter Luune. Nachem letschte Ufftritt nach de 11i uff dr Mühlistäge händ sich d'Schlössli im Dorf verteilt zum no witer feschte. Einigi sind au heime, will am Mittwuch schaffe agseit isch. Es isch e tolli Aescher Fasnacht gsi und mir sind bereit gsi für d'Basler Fasnacht... nur no 6mol schlofe hets gheisse.

Matti-Babbe-Fischi



Basler Fasnacht 2019

Wenns am Mäntig 4i schloht.... jetzt isch er do gsi, dr Momänt wo mr alli druff gwartet händ. Sit mir an dr GV 2018 entschiede händ, dass mir uff Basel an d'Fasnacht „usswandere“. Jetzt ischs also sowit gsi... d'Schlössli Schränzer sind 3 Tag z'Basel uff dr Gass azträffe. Einigi natürlisch scho am Morgestraich no in Zivil, aber denn die ganz Bandi bim Träffpunkt vorem Cortége vorem Hotel Dreikönig. Dr Puls isch minütlich gstiege und erfahrene Schlössli Fasnächtler sind ächt nerwös gsi. In de neue Kostüm ganz em Sujet entsprächend sind mir als Wanderslüt bereit gstande zum s' erschtmol uf d'Route zgoh. Dr Tobi het uns als fröhliche Steibock agführt. Denn ischs au scho los gange. Dr Himmel isch zwar Wolkebehangen gsi, aber mir sind bi trochenem Wätter mit einige Sunnestrahle in die „drey scheenschte Täg“ gstarte. Nach dr erschte Pause und luter grinsende und fröhliche Schlössli hämmer gwüst, es isch die richtig Entscheidig gsi dä Schritt z'wooge. Bim Kunschtmuseum churz vor dr Wetschtebrugg het dr erschti Rägegutsch gäh...dä hämmer bis über d'Brugg mitgnoh wo die näggscht Pause agstande isch und denn aber au schowieder z'Sunne duredruckt het. Au wenn mir natürlich dütlich länger unterwägs gsi sind wie mir uns das so gwohnt gsi sind isches e wohri Freud gsi und d'Zit isch wie im Flug vergange. Bim Claraplatz acho, hämmer unser erscht Cortége beendet. Mol e Momänt duureschnuufe isch agseit gsi. Im Volkshuus hämmer unser Materialdepot gha für d'Fasnacht und das händ einigi gnützt, zum Chleidertechnisch go ufrüschte oder eifach schnäll go uszträtte. Im Volkshuus hämmer denn au z'Nacht gässe. Nach dere wohlverdiente Stärkig simmer denn wieder ab uff d'Gass und händ do und dört e Platzkonzärt gäh und d'Fasnacht so richtig gnosse. Z'Obe het sich denn au dr erfahrene Vortrab mit em Dave und em Schriber so richtig usszahlt. Dr Tobi chunnt zwar usem grosse Kanton, aber mit dr Orientierig im Gross- und aber au im Chleibasel ischs nid soooo guet bstellt gsi bi ihm. Für die näggscht Fasnacht gits do e vorab-orientierigs-besichtigungs Inspektion... ;-) Dr Schriber und dr Dave händ uns super dur d'Stadt gführt und mir händ dr Obe in volle Züg gnosse.

Dr Fasnachtszischtig kenne mir uns jo scho vo all de letschte Johre... aber trotzdem isches ganz e spezielle Tag gsi. Bsunders für zwei Schlössli.... d'Anina und dr Fafi (mis chline Brüederli), in dr Gugge kenne und liebe glernt, händ ghürote! Am Fasnachtszischtig hämmer uns en famille bim Standesamt bim Münster obe troffe und dr Trauig biigwohnt. Denn simmer zur Fähri abe und übere Rhy in richtig Volgshuus disloziert. Dört händ denn au die räschtliche Schlössli und die gladene Gäscht uf d'Hochzitgesellschaft gwartet und denn hämmer alli uff die Zwei agstosse! Nach dem tolle Alass und Aperero sind mir denn langsam aber sicher wieder uff d'Gass, will es isch jo immer no Fasnacht gsi ;-) dr Zischtig ghört uns Guggene und entsprächend sind mir dur d'Stadt zoge, vom Chlei- ins Grossbasel und wieder zrug, ufe Kasärneplatz und denn zum Znächtässe in d'Künschtlerklause unde im Häbse-Theater. Frusch gestärkt simmer denn in Richtig Claraplatz wo mr am Claramonschter uffträtte sind. Do mir als letschti Gugge dra gsi sind, hämmer no schön Zit gha zum verwiile, fiire und öbbis z'trinke. S'het viel Publikum gha wo in super Stimmig gsi sind und die händ au alli brav gwartet, bis mir zum Schluss uffträtte sind. Es isch halt scho toll vor so viele Lüt uffträtte wo Stimmig mache. Mir händ mit unserer Musig drzue bitreit. Nachem Ufftritt simmer denn no witer dur d'Stadt zoge, aber mir händ denn au nid allzuspocht d'Instrumänt versorgt, schliesslich stoht jo no dr Mittwoch vor dr Tür....aber Heime simmer natürlich no lang nid... also usser d'Brut (gäll Schwögere :-). Denn simmer halt mit em Brüetigam no in Schnäderäntechäller go 1 Änte suffe... schliesslich hets was z'fiire gäh... ok.... am Schluss sinds wieder 7-10 Änte worde... aber hey... s'isch Fasnacht! (Fortsetzig uff Site 4)




Mit meh oder weniger schwerem Kopf hämmer uns am Mittwoch wieder troffe zum dr zweiti Cortége in agriff z'näh. Wieder hämmer alli immerwieder uff e Rägeradar gluegt, wills wieder rächt bewölkt gsi isch am Himmel. Mir sind in Richtig Mäss und Wettsteiplatz abmarschieret. Vor dr Wettsteibrugg hämmer denn e pefekt timeti Pause gmacht.... will s'het denn so richtig afo rägne und winde. Zum Glück isches nid allzulang gange und mir händ denn witer chönne. Über d'Wettsteibrugg, zum Barfi und d'Freiestroos durab isches richtig Schiffländi gange. Am Schluss alles troche und mit freudigem Publikum am Strosserand. Scho chli routinierter und mit Erfahrig vom Mäntig hämmer d' Route absolviert, und natürlich schön bi jedem Comité-Poschte verbi. Nachere Pause hämmer denn d'Route bis zur Mäss durezoge, wo mr denn im Mässeturm im Hotel Hyperion imene grosse Saal e super Znacht gnosse händ. Und sau glatt hammers au no gha... ämel bi unserem grosse Tisch... mir händ glache bis dr Buch wehgmacht het :-). Nach dem guete Znacht und em gmüetliche höckle ischs denn e bitzli schwieriger gsi wieder ganz in d'Gäng zcho... und ganz troche isches denn au nid immer gsi. Das het aber unse- rer super Stimmig nit gschadet und mir sind in die letscht Fasnachtsnacht vo dere Fasnacht gstartet. Mir händ musiziert, s'triebe uff de Strosse gnosse und Zämme e gueti Zit gha. Alles in Allem isches eifach e super Zit gsi und mir händ denn aber scho au bitz uff e Schlusstraich gwartet.... die eint oder ander Pause isch denn fascht chli zviel gsi... aber für unseri erschti kompleteti Basler Fasnacht, wüdi meine isch alles fascht riibigslos gloffe und mir händs eifach numme guet gha zämme. Nach längerem wärweise hämmer denn au näbem Volkshuus e Plätzli füre Änderstraich am 4i am Morge gfunde. D'Putzmaschine sind wie d'Geyer parat gsi zum loslegge wens denn 4i schloht. Unser timing isch perfekt gsi, und mir sind zimli uf d'Minute fertig gsi mit de letscht gspielte Tön für d'Fasnacht 2019. Herrlich isches gsi, und für alli isch am Schluss klar gsi... das blibt nid e eimoligs Abenteuer vo de Schlössli-Schränzer. Mir sind wieder debi... wens am Mäntig am 02. März 2020 vieri schloht.....

Matti-Babbe-Fischi

Bummel 2019

Wie immer sind mir am zweite Bummelsunntig uf unsere Bummel gange. Troffe hämmer uns für eimol nid im Lokal, sondern zmitzt im Dorf im Tipi. Nachdäm alli itroffe sind und alle e Käffeli oder e Bier gha händ, simmer au scho ins Tram und richtig Münchestei gfare. Bi dr Gartestadt sin mir ussgstiege und in richtig Industrie- viertel losgloffe. Alli händ gwährweist was mr ächt do hinde so mache chönnt. Und denn... tadaaaa... simmer alli wieder Kinder gsi. Mir sind in Flipperclub Basel :-). Für die ganz Junge, ganz e neuvi Erfahrig. Nachere churze Ileitig, hämmer uns an die unzählige Flipperchäschte verteilt!!! I glaub wirklich Alli händ e strahle in de Auge gha. Die ältische Flipperchäschte sind uss de 1959er Johre gsi und es isch ächt faszinierend gsi.... e riese Gau- di! Nachem erschte Ispiile het, wär het wölle, amene chliine Turnierli teilnäh. Es isch gflipperet worde bis d'Fin- ger glüeht und d'Ohre gwagglet händ.... isch rächt e Meis gsi dört inne... „bling bling zonk swush“ hets gmacht. Nach öbbe 3 Stunde hämmer denn witer dörfe/müesse und mir händ uns bi de Flipperfründe bedankt und ver- abschiedet. Es isch jedem z'empfähle, au mol privat e Bsuech im Flipperlokal abzstatte. Mir sind denn witer, mol musizierend, mol ohni sounde durch Münchestei gwatschlet ins Restaurant Pizzeria Bonanza. Dört häm- mer bi gueter luune und hungrige Büuch e feins Zmittag gnosse und plauderet und glache. Nachdäm mir uns mit eme Ständeli fürs d'Gastrfundschaft bedankt händ, simmer wieder ins Tram, dasmol in Richtig Stadt igstie- ged. Z'Basel acho hämmer no gnueg Zit gha zum gmüetlich dur d'Stadz z'bummle und nomol richtig viel z'musi- ziere. Irgendwann simmer denn hinter dr Steine bim Birsig Parkplatz hämmer uns denn nomol e Aperognä- migt, bevor mr denn langsam aber sicher richtig Igang Freiestroos verschobe händ. Eimol meh isches e super Erläbnis gsi, die bumpevolle Freiestroos durab z'defiliere und nomol musikalisch alles z'gäh! Super isches gsi. Wie jedesjohr hämmer denn am Märtpplatz linksumkehrt gmacht und händ denn ufem Barfi uf dr Stäge vor dr Barfüesserkirche unser Abschlusskonzärt gäh. E tolle Tag und vor allem e super Fasnachtsaison isch somit z'Änd gange. Viele Dank am Bummel-OK und allne Schlösslis für dä super Tag!

Matti-Babbe-Fischi



Ussprochsitzig

Wie jedes Jahr, wenn d'Probe und d'Fasnacht umme sind, wird s'vergangene Vereinsjahr nomol uffgearbeitete. Früehner hämmer däm Lämpesitzig gseit... aber will mr eigentlich überhaupt keini Lampe hän bi uns im Verein, oder scho länger kei Vorfall me gha händ wo däm Ussdruck grächt würd wärde, heisst das bi uns Ussprochsitzig, wo me einigi Pükt vo de vergangene Mönat zämme aluegt. S'Fazit vo däm Obe...:

Grundstimmig im Verein -> sehr guet

Aescherfasnacht in abgspäckter Form -> guet

Entscheid Basler Fasnacht -> guet

Ablauf und Organisation Basler Fasnacht -> sehr guet

Neue Major , au wenn er chli komisch redet -> sehr guet ☺

Probe unterem Jahr -> guet (dr eint oder ander chönnt nochli meh ufftauche, und wenn dr Tobi

izellt isch RUEH!!!!)

Sujet und Kostüm -> grundsätzlich simmer sehr zfriede, über d'Farbwahl säge mr jetzt nix meh ;-)

Ihr sehd... und gohts eigentlich seh guet und es het kei grossi Diskussionspükt gäh, wo mr händ müesse konkret agoh oder in Agriff näh. Es isch meh e guete Meinigsustusch gsi, wo uns hälfe wird, als Verein witer z'verbessere und zämme witer zcho!

Nachem offizielle Teil sin denn die meischte no gmüetlich zämme gsässe und händ au im chlinere Rahme s'Veinsjahr lo Revue passiere loh und die eint oder ander Episode vo dr Fasnacht nomol lo uffläbe.

I dank do isch in däm Rahme au wieder mol zit, zum am Vorstand z'Danke für d'Arbet wo s'ganze Jahr vo däm Gremium gleichtet wird. Es isch sicher nid immer eifach dä Huffe bi luune z'balte. Aber dr Verein het sich mit em Entscheid für Basel sicher sälber uf e guete Wäg brocht. Denn natürlch au am Chällertem und vorallem em Chäller-Chef Hörb e grosses Dankschön für dr Isatz wo er unterem Jahr leischtet. Fascht jede Mittwuch ischs er wo s'Liecht löscht wenn die letscht gange sind... und au sunscht isch er fascht immer im Lokal azträffe... Guete Maa!!!! Natürlich gits no viel Anderi Komissione und Mitglieder wo mit viel Isatz dä Verein zu däm mache was er isch. Es brucht sowieso jede einzelne, dases funktioniert. Und im Momänt funktioniert ächt guet!

Matti-Babbe-Fischi

23. Generalversammlig vo de Schlössli-Schränzer

Am 3. Mai 2019 hän mir dörfe e witr Vereinsjoor vo de Schlössli-Schränzer verabschiede.

Ab 19.30 Uhr hän sich die erste Aktivmitglieder bereits im Lokal igfunde und hän sich scho mit Chips, Nüssli und diverse Getränk für de obigatorischi Obe ideckt.

Ab 20.00 Uhr het den unsr Presi, dr Michel die 23. Generalvrsammlig eröffnet.

Nochdem d Stimmezähler vo de Tischreihe bestimmt sin gsi het meh die diverse Kommissionsbricht dörfe alose.

Dr Jooresbricht vom Michel, dr MuKo vom Tobi, dr Sujetbricht vom Fafi, dr Bricht übr die diverse Auftritte vo de Rachel und dr Lokalbricht vom Adrian.

Aschliessend het den unsr Kassier, dr MR dr Kassebricht ufem Beamr präsentiert. Do het meh den alli Köste und Usgoobe vom ganze Joor chöne igseh.

Dr Martin het den dr Revisionsbricht vorglese und d'Entlastig vom Kassier beatreit. Miteme warme Applaus vo de Aktivmitglieder isch den Decharge erteilt worde.

Somit isch bereits Bekanntgob vo de Abgäng vo de Aktivmitglieder ufem Programm gstande. Vier Abgäng vo Aktivmitglieder und 2 Pausierigsgsuech sind bim Vorstand igange.

Wenn abr Aktivmitglieder dr Verein vrlöhn dörfe mir au immer wieder neu Gsichter im Verein ufneh. In dem Joor sin das d'Judith, d'Feli, dr Massi, dr Özkan, dr Marc, dr Tobi, dr Niggli und dr Marco gsi. Willkommen bi de Schlössli-Schränzer!

Nochem Festlege vom Joores- und Kostümbiträg, dr Ahnahm vom Budget vo de Saison 2019/2020, einere Statuteänderige wo Agnoh worde isch, isch d Wahl vo de Tagespräsidentin agstande. Dr Vorstand het d Manu ins Renne geschickt, wo denn au einstimmig agnoh worde isch. Sie het den kurzdrufabe dr Michel als unser zuekünftige Präsident vorgschlage. Au das isch einstimmig agnoh worde sowie die witere Pöste vom Vorstand.

Dr Vorstand vo de Schlössli-Schränzer in dr Saison 2019/2020 sind folgendi Persone:

Präsident	Michel Kunz
Vizepräsident	Fabian Baumann
Aktuar	Lukas Giger
Kassier	Marc-Roman Fasoli
Kellerchef	Adrian Schneider
Materialwart	Fabian Fischlin
Guggenmajor	Tobias Ellegast

Noch e paar Infos zude nächste interne Aläss het dr Michel d GV als beändet erklärt und zume Barbsuech grothe.

Viele Schlösslis sind dem gfolgt und hän im Lokal e schöne Saisonabschluss beschert....

Im Name vo de Guggezytig
Hörb

2. Summerhock 2019 in de Peter's Reben

E bekannts prichwort heisst „Noch dr Fasnacht isch vor dr Fasnacht!“ Darum wird au bi uns im Summer fluessig am Verein gschliffe, damit denn wenn Däg kürzer und kälter werde alles in de greglete Bahne vrlauft.... oder verlaufe sött ☺

Dorum hän mir bereits zum zweite Mol e offizielle Summerhock bi de Angi in de Peter's Reben dörfe stattfinde loh. D Organisation het drbi dr Vorstand mit de Hilf vo de Angi übernoh. Drei Maa sind go ufbaue, zwei Maa go abbaue und ei Maa het sich ume Grill kümmeret... doch halt, mir sin doch siebe Männer im Vorstand???? Dr Presi isch leider feriehalber abwesend gsi.

Am 5. Juli 2019 ab de 18:30 Uhr, hän sich den alli Schlössli-Mitglieder zum Aperö in de Rebe troffe. Es het au s einte odr andere neue Gsicht nit dörfe fehle, die het meh jo nur eimol kurz inere Summerprob chönne begriesse. An dem Alass het meh sich den richtig chönne mit de Neo-Schlössli unterhalte und alles froge was meh so het welle wüsse.

Es sin e paar luschtigi Gsichter drunter wo noch mim Erachte sehr guet in de Verein passe werde. Ich bi gspannt was no alles uf die Neue zuecho wird.

Ab 19:00 Uhr het denn unsere Vizepresi, dr Baumi, s Wort ergriffe. Kurz druf abe het den d Wahl vom Sujet für d Fasnacht 2020 gstartet. D Sujetkommission, vrtrette durch dr Fafi und em Joel hän die zahlriche Vorschläg vo de einzelne Mitglieder ufem Beamer vorgestellt. Do s Liecht nit optimal isch gsi, hets no e Liveticker im Schlössli-Chat geh.

Noch mehrere Abstimmrunde isch den für Jedi und Jede klar gsi als was mir laufe. Eine het das richtig gfreut. Worum wird jetzt do leider nit vrröhte.

Mir laufe an dr Fasnacht 2020 als nei au das wird do in dere Guggezytig nonig vrröhte.

Mir sin emel fertig gwanderet und hän unser Etappeziel erreicht. Somit dörfe mir den die himmelblau und rosarote Gwändli vo de Fasnacht 2019 im März in Schrank hänge. Dr Eint odr dr Ander wird vielleicht nit ganz unglücklich si.

Noch dr Abstimmig het meh d Klöpfer und Brotwürst ufe Grill do und die selbergmachte Saläter präsentiert. S Buffet isch schnell belageret worde und dr Tobi am Grill het au e gueti Figur gmacht.

Es isch trunke, gesse, gschwätzt und glacht worde. S Vereinsläbe het meh an dem Obe / Nacht richtig ufläbe loh.

Nochdem au s Dessertbuffet vrdruggt isch gsi hett meh no paar Tanzilage dörfe bewundere wo die altigesene Schlösslis zum Beste hän geh. Dange do drfür. Ihr sind super gsi ☺

Somit isch de Summerhock au scho wieder Gschicht gsi.

Ich freu mi ufe Saisonstart. Denn dörfe mir wieder unser musikalische Köne untr Bewiss stelle.

Im Name vo de Guggezytig
Hörb

Unser Vereinslokal

Seit dem Jahr 2013 haben wir unsere neue Heimat im Industriegebiet Weiden in Aesch gefunden. Was früher als Arbeitsstätte einer ehemaligen Firma diente, wurde durch uns mit viel Fleiss und Schweiß zu einem multifunktionalen Vereinslokal umgebaut.

Nebst einer gemütlichen Sofaecke, einem Materiallager, sowie einer unverzichtbaren langen Bar wurde das Lokal mit einer gestuften Bühne ausgestattet, welche als Voraussetzung für ein optimales Proben dient.

Das Lokal mieten

Bist du auf der Suche nach der passenden Lokalität für deine nächste Party, Geburtstagsfest, Registerprobe, Vereinsanlass oder sonstige Aktivität?

Das Lokal der Schlössli-Schränzer kannst du auch mieten!!

Für detailliertere Auskünfte wie Verfügbarkeit und Mietbedingungen, melde dich doch gleich unter:

lokal@schloessli-schraenzer.ch

Das LokalTeam freut sich auf deine Nachricht



Leserbriefe, Inseratenbestellungen, Artikel,
Anregungen, Kritik, Lob etc. an:
info@schloessli-schraenezer.ch

Merci beschtens
Matti-Babbe-Fischi

www.schloessli-schraenzer.ch